

ՀԱՅՐԵՆԻՔ ԲԵՐՎԵՑԻՆ ԱԼԵՔ ԵՎ ՄԱՐԻ ՄԱՆՈՒԿՅԱՆՆԵՐԻ ԱՃՅՈՒՆՆԵՐԸ

Հուլիսի 13-ին Դեսոյոտից Հայրենիք բերվեցին Հայաստանի Հանրապետության Ազգային հերոս, Հայկական Բարեգործական Ընդհանուր Միության ցկյանս նախագահ և Մայր Աթոռ Սուրբ Էջմիածնի ազգային բարերար լուսահոգի Ալեք Մանուկյանի և նրա կողակից Մարի Մանուկյանի աճյունները:

«Զվարթնոց» օդանավակայանում ՀՀ Պաշտպանության նախարարության պատվո պահակախմբի ուղեկցությամբ Մանուկյանների աճյունները դուրս բերվեցին օդանավից, ապա Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն աղոթք վերառաքեց բարեհիշատակ բարերարներ Ալեք և Մարի Մանուկյանների հոգիների հանգստության և խաղաղության համար:

Արարողությանը ներկա էին ՀՀ ԱԺ նախագահ Տիգրան Թորոսյանը, ՀՀ վարչապետ Սերժ Սարգսյանը, Հայաստանյայց Առաքելական Սուրբ Եկեղեցու թեմակալ առաջնորդներ և Մայր Աթոռ Սուրբ Էջմիածնի միաբաններ, Ալեք և Մարի Մանուկյանի դուստր Լուիզ Մանուկյան-Սիմոնը, Մանուկյան ընտանիքի անդամներ, ՀՀ Մշակույթի նախարար Հասմիկ Պողոսյանը, ՀՀ ԱԳ փոխնախարար Արման Կիրակոսյանը, Հայկական Բարեգործական Ընդհանուր Միության նախագահ Պերճ Սեդրակյանը և ՀԲԸՄ Կենտրոնական վարչության անդամներ:

Աղոթքից հետո սգո թափոռն ուղղվեց Ս. Գայանե վանք, որտեղ Ամենայն Հայոց Կաթողիկոսի բարձր նախագահությամբ կատարվեց հոգեհանգստյան պաշտոն: Հավարտ արարողության Նորին Սրբությունն իր խոսքն ուղղեց ներկաներին:

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍ-
ՔԸ ԱԶԳԱՅԻՆ ԲԱՐԵՐԱՐՆԵՐ ԱԼԵՔ ԵՎ ՄԱՐԻ ՄԱՆՈՒԿՅԱՆՆԵՐԻ
ԱՃՅՈՒՆՆԵՐԻ՝ ՄԱՅՐ ԱԹՐՈՒ ՍՈՒՐԲ ԷԶՄԻԱԾԻՆ ՓՈԽԱԴՐԵԼՈՒ
ԱՌԻԹՈՎ**

(13 հուլիսի 2007 թ., Ս. Գայանե եկեղեցի)

Մեծարգո Նախագահ Ազգային Ժողովի, սիրելի Մանուկյան ընտանիք, հոգևոր հայրեր, սիրելի բարեպաշտ ժողովուրդ.

Խորախորհուրդ է Հայրենիքի սիրով ապրած զավակների վերադարձը Հայրենիք՝ հանգրվանը ազգի անմահ հոգու: Բարձրյալի շնորհով այսօր հայրենի ազատ մեր հողը ընդունում է իր նվիրյալ զավակներին՝ Ազգային հերոս, Հայկական Բարեգործական Ընդհանուր Միության ցկյանս Նախագահ Ալեք Մանուկյանին և իր մեծագնիվ տիկին Մարի Մանուկյանին, ովքեր ապրեցին և անմահացող ջանքեր ներդրեցին ի սեր աշխարհասփյուռ մեր ժողովրդի հոգևոր-ազգային կյանքի զարթոնքի ու պայծառության: Մեծ նվիրատվություններով նրանք պայծառացրին մեր ե-

կեղեցիները, կրթական ու ազգային հաստատությունները: Հայրենիքի բարօր ու բարգավաճ, նոր կյանքի տեսիլքով և հավատով նրանք կերտեցին իրենց և բազում հայորդյաց կյանքի լուսավոր ուղին: Մեծ բարերարների ձգտումն էր Հայրենիքի պատկերի, հայրենյաց ժառանգության պահպանումը հայորդյաց հոգիներում: Հայրենիքի ու հայ ժողովրդի լուսավոր գալիքի, Սուրբ Էջմիածնի հավատարմության հավատն է նրանց ավանդը սերունդներին, ազգի հարատևության հավատը՝ հայրենյաց արժեքներով ու սրբություններով:

Մեր Եկեղեցու, Սուրբ Էջմիածնի սերը մանկուց էր սերմանված Ալեք Մանուկյանի հոգում: Նա միշտ ջերմ սիրով կապված եղավ եկեղեցական կյանքին՝ նպաստելով մեր Եկեղեցու առաքելությանը, այլև՝ բարեգործական ծրագրերով և որպես սարկավագ՝ Տիրոջ Սուրբ Սեղանին սպասավորությամբ: Մենք խորին հուզմունքով ենք անդրադառնում, որ հավատավոր ազնիվ սրտով Ալեք և Մարի Մանուկյանները աստվածապարզ իրենց ողջ կյանքի ընթացքում հոգացին մերձավորի համար՝ բազմաթիվ բարեգործություններով կյանքի կոչելով ավետարանական պատվիրանը: Նրանք՝ իբրև արժանավոր քաղաքացիներ Միացյալ Նահանգների, երախտագետ հոգով հանդես Ամերիկյան, իրենց բարերարություններից մասնահանում կատարեցին նաև Միացյալ Նահանգների կրթական ու մշակութային կյանքին:

Անմոռաց է լուսահոգի Տեր և Տիկին Մանուկյանների պայծառ հիշատակը: Եկեղեցաշեն ու ազգօգուտ իրենց գործերով նրանք արժանացել են աշխարհասփյուռ մեր ժողովրդի ջերմ սիրույն և անկեղծ հարգանքին: Նրանց առաքինի կյանքի դրվատումն են և ծառայությանց ու վաստակի գնահատանքը՝ բարձր մրցանակներն ու շքանշանները, որ շնորհվել են Ալեք Մանուկյանին: Նա արժանիորեն կրում էր նաև մեր Եկեղեցու բարձրագույն՝ «Սուրբ Գրիգոր Լուսավորիչ» շքանշանը և Հայաստանի Ազգային հերոսի կոչումը:

Աղոթք և օրհնություն խնկարկենք նրանց շիրիմներին: Գոհաբանական աղոթք բարձրացնենք առ Աստված, որ ազգասիրության ու եկեղեցասիրության նրանց ոգին և բարի գործոց օրինակը շարունակում է ապրել հայորդյաց հոգիներում, ինչպես նրանց զավակների՝ Լուիզ Մանուկյան-Միմոնի և Ռիչարդ Մանուկյանի և թոռների, ովքեր այսօր իրենց կարևոր ներդրումն են բերում մեր Եկեղեցու պայծառությանը, մեր Հայրենիքի բարօրությանն ու առաջընթացին:

Միբելիներ, այսօր ուրախ են մեր հոգիները, որ մեր Եկեղեցու արժանավոր զավակների, ազգային մեծ բարերարների մարմինները որդու և դստեր համաձայնությամբ փոխադրվել են Միացյալ Նահանգներից՝ ամփոփվելու մեր հոգևոր նվիրական կենտրոնում, Սուրբ Էջմիածնի աստվածային օրհնության ներքո:

Աղոթքով առ Երկնավորը մայր հողին պիտի հանձնենք լուսահոգի Ալեք և Մարի Մանուկյանների մարմինները՝ հավատով, որ մեր ժողովրդի կյանքում միշտ հառնած պիտի մնան նրանց բարեպաշտ ու ազգանվեր կերպարները, պիտի ապրեն նրանց ազնիվ գործերը՝ իբրև նրանց հավատավոր հոգու վկայություններ, շարունակելով մեր Եկեղեցու, Հայրենիքի և ազգային սրբությունների հանդես անսպառ



ԱԼԵՔ ԵՎ ՄԱՐԻ ՄԱՆՈՒԿՅԱՆՆԵՐԻ ԱՃՅՈՒՆՆԵՐԸ ՀՀ ՊԱՇՏՊԱՆՈՒԹՅԱՆ
ՆԱԽԱՐԱՐՈՒԹՅԱՆ ՊԱՏՎՈ ՊԱՏՎԱԿԱՆՄԱՐԻ ՈՒՐԵԿՅՈՒԹՅԱՄԲ ՕԴԱՆԱՎԱԿԱՅԱՆԻՅ
ՓՈԽԱԴՐՎՈՒՄ ԵՆ Ս. ԷԶՄԻԱՅԻՆ



ՀՈԳԵՆԱՆԳՍՅԱՆ ՊԱՇՏՈՆ Ս. ՏՐԴԱՏԻ ԲԱՅ ԽՈՐԱՆԻ ԱՌՋԵՎ

նվիրումի ու աննվազ նախանձախնդրության նոր հունդեր աճեցնել սերունդների հոգում:

Աղոթենք, որ Ողորմած և Մարդասերն Աստված երկնային բարձունքներում լույսերի մեջ երանությամբ պարուրյալ պահի հավիտենական կենաց խաղաղ ափին հանգրվանած Իր հավատարիմ զավակների հոգիները և օրհնի մեզ՝ մարմնավորելու մեր Հայրենիքի ու ժողովրդի միացյալ երջանիկ կյանքի նրանց և ամենքիս տեսիլքը:

«Շնորհ եւ սէր եղիցին ընդ մեզ եւ ընդ ամենեսեան:

Յիշեա, Տէր, զհոգիս երանաշնորհ բարերարացն մերոց՝ Ալեք եւ Մարի Մանուկեանների, եւ յանգո զնոսա ի լոյս երեսաց աստուածութեան Քոյ. Ամէն»:

Հուլիսի 17-ին Մայր Աթոռ Սուրբ Էջմիածնում պետական արարողակարգով և եկեղեցական ծիսակարգով հողին հանձնվեցին Հայաստանի Հանրապետության Ազգային հերոս, Հայկական Բարեգործական Ընդհանուր Միության ցկյանս նախագահ և Մայր Աթոռ Սուրբ Էջմիածնի ազգային բարերար լուսահոգի Ալեք Մանուկյանի և նրա կողակից Մարի Մանուկյանի աճյունները:

Հանգուցյալ մեծանուն հայորդիների աճյունները ժամը 10.00-ին Սուրբ Գայանե վանքից տեղափոխվեցին Մայր Աթոռ Սուրբ Էջմիածին, ուր Սուրբ Տրդատ թագավորի բաց խորանի առջև դրվեցին հատուկ պատվանդանների վրա:

Ապա կատարվեց հոգեհանգստյան պաշտոն՝ բարձր նախագահությամբ Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի և ներկայությամբ ՀՀ նախագահ Ռոբերտ Քոչարյանի, ԼՂՀ նախագահ Արկադի Դուկասյանի, ՀՀ ԱԺ նախագահ Տիգրան Թորոսյանի, ՀՀ վարչապետ Սերժ Սարգսյանի, Ալեք և Մարի Մանուկյանների զավակներ Լուիզ Մանուկյան-Սիմոնի, Ռիչարդ Մանուկյանի և Մանուկյան ընտանիքի այլ անդամների:

Արարողությանը ներկա էին Հայաստանյայց Առաքելական Սուրբ Եկեղեցու թեմակալ առաջնորդներ և Մայր Աթոռ Սուրբ Էջմիածնի միաբաններ, ՀՀ Կառավարության անդամներ, ՀԲԸՄ նախագահ Պերճ Սեդրակյանը, ՀԲԸՄ Կենտրոնական վարչության անդամներ, գիտության և մշակույթի գործիչներ:

Հավարտ արարողության Ամենայն Հայոց Կաթողիկոսն իր խոսքն ուղղեց ներկաներին. «Ուրախ եմ մեր հոգիներն այսօր՝ ամփոփված տեսնելով Ալեք և Մարի Մանուկյանների մարմիններն իրենց համար միշտ նվիրական հայրենի հողում, իրենց սրտերին շատ սիրելի Սուրբ Էջմիածնում, որոնցից երբեք բաժանված չեղան: Մերնդեսերունդ մեր զավակները պիտի այցելեն այստեղ նրանց նվիրատվությամբ կառուցված Գանձատուն և զան խոնարհվելու նրանց շիրիմներին: Պիտի աղոթեն նրանց միջոցներով նորոգված և կառուցված եկեղեցիներում, ուսանեն նրանց հովանավորությամբ գործող կրթական հաստատություններում, պիտի ներշնչվեն նրանց բարի գործերով, ազգասեր, հայրենասեր ու եկեղեցասեր ոգով ու օրինակով նրանց, ովքեր «Մահկանացու ծնվելով՝ անմահ հիշատակ թողեցին»: Այսպես է կան-

գուն ժողովուրդը՝ նվիրումով, ծառայությամբ, ազնիվ ու պանծալի գործերով և դրանց գնահատությամբ ու արժեվորումով՝ սերնդեսերունդ:

...Գոհության աղոթք բարձրացնենք երկինք, որ Տերը օրհնել է մեր ժողովրդին նվիրյալ զավակներով և նրանց հույսերով, նրանց հավատով ու ջանքերով առաջնորդել ազգս դեպի նոր արշալույս, որ շողում է մեր պետականության վերականգնումով, Արցախի ազատագրությամբ և Սփյուռքի հառնող ու ծաղկող կյանքով», - ասաց Նորին Սրբությունը:

Այնուհետև «Աշխարհի ամենայն» շարականի երգեցողության ներքո ՀՀ Պաշտպանության նախարարության պատվո պահակախմբի և հոգևորականների ու աշխարհականների թափորի ուղեկցությամբ Մանուկյանների աճյունները տեղափոխվեցին իրենց բարերարությամբ կառուցված Գանձատան առջև՝ հողին հանձնելու համար: Այստեղ կատարվեց թաղման արարողության կարգը: ՀՀ պետական դրոշը պատվո պահակախմբի կողմից հանձնվեց Ալեք և Մարի Մանուկյանների զավակներ Լուիզ Մանուկյան-Սիմոնին և Ռիչարդ Մանուկյանին: Ապա ՀՀ պետական օրհներգի ներքո լուսահոգի բարերարների աճյուններն իջեցվեցին գերեզման:

Այնուհետև Վեհարանի հարկի ներքո տեղի ունեցավ ընդունելություն, որի ընթացքին խոսքով հանդես եկան ՀՀ ԱԺ նախագահ տիար Տիգրան Թորոսյանը, տիար Ռիչարդ Մանուկյանը և տիկին Լուիզ Մանուկյան-Սիմոնը:

«...Ալեք Մանուկյանի կյանքն ու գործունեությունը սիրո և նվիրումի եզակի մարմնացում եղան՝ առ իր ընտանիքը, իր ժողովուրդն ու Հայրենիքը: Ահա թե ինչու իր երկրային կյանքի ավարտից հետո էլ իր գործը շարունակվում է իր զավակների՝ Լուիզ Սիմոն և Ռիչարդ Մանուկյանների շնորհիվ: Վերադառնալով Հայրենիք, մեծ բարերարն այսօր ստանձնեց իր վերջին առաքելությունը՝ իր ներկայությամբ ու օրինակով ազգանվեր գործունեության մղելով բազմաթիվ հայորդիների, քանզի անհերքելիորեն ապացուցել է, որ անձնական հարստությունը իմաստ ու արժեք է ստանում բարեգործությամբ ու նվիրումով», - նշեց ՀՀ ԱԺ նախագահն իր խոսքում:

«Նրանց կյանքը մեզ համար շողացող մի արահետ է խորհրդանշել՝ մշտապես ուղղված դեպի Հայաստան հինավուրց երկիրը: Հայրս իր կյանքում թեև չմիացավ հոգևորականների սրբազան շարքերին, սակայն սրտի խորքում մշտապես մեծ սեր ուներ Հայ Առաքելական Սուրբ Եկեղեցու հանդեպ: Նրա խորին հավատը և իր նախնիների հավատի նկատմամբ իր նվիրումը առաջնորդել են նրան ողջ կյանքի ընթացքում...: Մա հատուկ պատիվ է նրանց՝ ընծայված Հայ Եկեղեցու կողմից՝ ի գնահատություն նրանց նվիրումի և ծառայության Հայաստան մեր Հայրենիքին և Մայր Աթոռ Սուրբ Էջմիածնին:

Հայրս միշտ երանությամբ էր հիշում Հայաստանում անցկացրած օրերը՝ հատկապես այն օրը, երբ այստեղ կատարվեց Ալեք և Մարի Մանուկյանների Գանձատան բացումը: Նա իր սրտի զգացումներն արտահայտեց՝ ասելով. «Յուրաքանչյուր մարդ կյանքում ունի երազանք: Իմ երազանքը մշտապես եղել է այն, որ մեր նախնայաց հայրենիքի շինությանը կարողանամ ավելացնել իմ սեփական աղյուսը... Ես



ՊԱՏԿԱՆ ՊԱՏԿԱՆՍԻՐԻ ԿՈՂՄԻՑ ՀՀ ԵՌԱԳՈՒՅՆԸ ՀԱՆՁՆՎՈՒՄ Է ԱԼԵՔ ԵՎ ՄԱՐԻ ՄԱՆՈՒԿՅԱՆՆԵՐԻ ԶԱՎԱԿՆԵՐԻՆ



ԳԵՐԵՉՄԱՆԻ ԿՆԵՄԱՆ ԱՐԱՐՈՂՈՒԹՅԱՆ ԸՆԴԱՏՔՈՒՄ

ինձ շնորհիման վրա եմ զգում, որ հնարավորություն եմ ունեցել մի քար դնել Հայրենիքիս սրբազան հողի վրա՝ Սուրբ Էջմիածին սրբազնագույն սրբավայրում»:

...Ծնողներս Հայաստան այցելել են նախքան անկախության հռչակումը, և նրանց ընդունեցին որպես բարերարների: Հայաստանի անկախացումը նրանք ևս ողջունեցին մեծ ուրախությամբ, քանզի անկախությունը հնարավորություն տվեց հայ ժողովրդին Սփյուռքում և Հայրենիքում միավորվել հանուն Հայաստանի ապագայի», - ասաց Ռիչարդ Մանուկյանը՝ շնորհակալություն հայտնելով Հայաստանի իշխանություններին և Հայոց Եկեղեցուն՝ ի պատիվ իր ծնողների ցուցաբերած վերաբերմունքի համար:

Ալեք և Մարի Մանուկյանների կյանքի ուղին ներկայացրեց տիկին Լուիզ Մանուկյան-Սիմոնը. «Այսօր ես զգում եմ՝ ծնողներս ժպտում են երկնքում՝ հիացած, որ նոր շրջան է սկսվել իրենց կյանքում, և երախտագիտություն հայտնում Նորին Սրբությանը, որ նրանք այժմ և հավետ հանգչելու են Սուրբ Էջմիածնի օրհնյալ հողում, որը սիրտն ու հոգին է յուրաքանչյուր հայի՝ անցյալի, ներկայի և ապագայի:

...Մենք երբեք չենք մոռանա այն տպավորիչ ընդունելությունը, երբ ժամանեցին մեր ծնողները, և այսօրվա հուզիչ հուղարկավորությունը: Անգամ հայրս, իր բոլոր երազանքներով հանդերձ, չէր կարող պատկերացնել անցնող այս օրերը», - նշեց տիկին Մանուկյան-Սիմոնը՝ իր հերթին ևս շնորհակալություն հայտնելով Ամենայն Հայոց Հայրապետին և ՀՀ նախագահին նման բացառիկ պատվի և հարգանքի համար, որին արժանացվեցին Ալեք և Մարի Մանուկյանները:

Հավարտ ընդունելության կատարվեց գերեզմանի կնքման կարգը:

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍ-
ՔԸ ԱԶԳԱՅԻՆ ԲԱՐԵՐԱՐՆԵՐ ԱԼԵՔ ԵՎ ՄԱՐԻ ՄԱՆՈՒԿՅԱՆՆԵՐԻ
ՄԱՐՄԻՆՆԵՐԻ՝ ՄԱՅՐ ԱԹՈՌ ՍՈՒՐԲ ԷԶՄԻԱԾՆՈՒՄ
ԱՄՓՈՓԵԼՈՒ ԺԱՄԱՆԱԿ
(17 հուլիսի 2007 թ., Ս. Էջմիածին)**

Մեծարգո Նախագահ,

Սիրելի Մանուկյան ընտանիք և բարեպաշտ ժողովուրդ հայոց.

Օրն այս հիշարժան է, իր խորհրդով նշանակալի ու նվիրական: Աստծո ողորմությամբ կատարվեց ցանկալին. մեր ժողովրդի նվիրյալ գավակներ, ազգի և մեր Եկեղեցու մեծ բարերարներ Ալեք և Մարի Մանուկյաններն իրենց վերջին հանգրվանն են գտնում Հայրենիքի ազատ հողում, Մայր Աթոռ Սուրբ Էջմիածնի հովանու ներքո, Արարատի հայացքի առջև:

Այսօր, երբ կանգնած ենք նրանց լուսավոր հիշատակի առջև, համակվում ենք ազգին մատուցած ծառայություններով լեցուն նրանց կյանքի և արժանավոր բազում գործերի անհուն գնահատանքով:

Մեծ ծառայություն էր վերապահված Ալեք Մանուկյանին մեր ժողովրդի կյանքում, որը նա հանձն առավ օրինակելի նվիրումով ու պատրաստակամությամբ: Վսեմ տեսիլքով նա բացառիկ ներդրում ու վաստակ բերեց Հայկական Բարեգործական Ընդհանուր Միության առաքելությանը՝ արժանանալով Միության ցկյանս Նախագահի բարձր պատվին: Ալեք Մանուկյանի նախանձախնդիր ղեկավարությամբ ընդարձակվեց ու ծաղկում ապրեց Բարեգործականի համագգային գործունեությունը՝ Մեծ Եղեռնին հաջորդած տասնամյակներում աշխարհասփյուռ հայությանը օտար ավերում առավելագույնս սատարելու և միասնական պահպանելու: Սփյուռքի կյանքում ազգային շատ կառույցների կողքին նա առանձնակի կարևորեց հայ դպրոցն ու Հայոց Եկեղեցին, որպեսզի հայրենյաց ժառանգությունը անաղարտ պահպանվի ու փոխանցվի սերունդներին, հայկականությամբ սնուցի և հավատով զորացնի հայորդյաց հոգիները:

Որդիական ջերմ սիրով Ալեք և Մարի Մանուկյանները հոգացին ու ջանացին Սուրբ Էջմիածնի պայծառության համար: Նրանց անունները անբաժան են Մայր Աթոռի պատմությունից, ինչպես նրանց կյանքը անբաժան եղավ Մայր Աթոռի առաքելությունից: Այն օրերին, երբ երկաթյա վարագույրով անջրպետված էր Հայաստանի և աշխարհասփյուռ հայության կյանքը, Ալեք Մանուկյանը, իբրև հարազատ գավակը իր ժողովրդի, միշտ կապված եղավ Հայրենիքի հոգսերին ու ապրեց նրա հույսերով: Ապրեց ու գործեց մեր ժողովրդի միասնության, Հայրենիքի ազատության և հայ կյանքի զարթոնքի հավատով: Արդարև, դժվար է գտնել նշանակալի դեպք կամ իրադարձություն ազգային-եկեղեցական մեր կյանքում նախորդ դարի երկրորդ կեսին, որին կարևորությամբ աղերսված չլինի Ալեք Մանուկյանի անունը: Նորանկախ մեր Հայրենիքը արժանիորեն գնահատեց Ալեք Մանուկյանի ծառայությունները և ավանդը ազգային կյանքում՝ շնորհելով նրան Ազգային հերոսի բարձր կոչումը: Հայրենանվեր ու եկեղեցասեր ծնողների նույն հոգեկերտվածքով ու ազնիվ նախանձախնդրությամբ այսօր նրանց զավակները՝ Ռիչարդ Մանուկյանը և Լուիզ Մանուկյան-Միմոնը, իրենց բարեգործություններով շարունակում են ծառայել մեր ժողովրդին՝ նոր ավանդ բերելով մեր Սուրբ Եկեղեցու պայծառությանը և մեր Հայրենիքի բարօրությանն ու առաջընթացին:

Ուրախ են մեր հոգիները այսօր՝ ամփոփված տեսնելով Ալեք և Մարի Մանուկյանների մարմինները իրենց համար միշտ նվիրական հայրենի հողում, իրենց սրտերին շատ սիրելի Սուրբ Էջմիածնում, որոնցից երբեք բաժանված չեղան: Մերնդեսերունդ մեր զավակները պիտի այցելեն այստեղ նրանց նվիրատվությամբ կառուցված Գանձատուն և գան խոնարհվելու նրանց շիրիմներին: Պիտի աղոթեն նրանց միջոցներով նորոգված և կառուցված եկեղեցիներում, ուսանեն նրանց հովանավորությամբ գործող կրթական հաստատություններում, պիտի ներշնչվեն նրանց բարի գործերով, ազգասեր, հայրենասեր ու եկեղեցասեր ոգով ու օրինակով նրանց, ովքեր «Մահկանացու ծնվելով՝ անմահ հիշատակ թողեցին»: Այսպես է կանգուն ժողովուրդը՝ նվիրումով, ծառայությամբ, ազնիվ ու պանծալի գործերով և դրանց գնահատությամբ ու արժեվորումով՝ սերնդեսերունդ: Այսպես է օրինյալ ժո-

դավրդի կյանքն ու ճանապարհը, քանզի «Եթե ուրուք գործն գոր շինեաց՝ կացցէ, վա՛րձս առցէ» (Ա Կորնթ. Գ 14):

Աղոթենք և հայցենք լույս և օրհնություն մշտնջենական՝ ազգային բարերարների արդար հոգիներին:

Գոհության աղոթք բարձրացնենք երկինք, որ Տերը օրհնել է մեր ժողովրդին նվիրյալ զավակներով և նրանց հույսերով, նրանց հավատով ու ջանքերով առաջնորդել ազգս դեպի նոր արշալույս, որ շողում է մեր պետականության վերականգնումով, Արցախի ազատագրությամբ և Սփյուռքի հառնող ու ծաղկող կյանքով:

Շնորհ, սէր և օրհնութիւն Տեառն մերոյ եւ Փրկչի Յիսուսի Քրիստոսի եղիցին ընդ մեզ եւ ընդ ամենեսեան: Ամէն:

ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ